

誠意伯文集

一
函
十二冊

補刻明太師誠意伯劉文成公集序

余宰青邑行南田詣明太師劉文成公
祠瞻其遺像整冠再拜肅敬久之引其
後之爲諸生者數人與之語因索公全
集讀之集重鋟於公齋之居甌江者簡
新矣然尚有恨者自十一卷至十八卷

俱闕如夫公之集流布海內藏書家多有之茲邑爲公桑梓地反不獲見其全何以備是邦文獻哉詢之耆師宿儒云甌江有藏庋鈔本甚珍之今年春以公事赴甌借而錄之以呈觀察芮公太守曹公咸躍然喜謂余盍補鋟之以成完璧余唯唯承命遂出一歲俸仍以授甌

江賢裔俾付梓人督成之凡閱五月計
卷八頁二百有餘或他雜著尚有缺者
而公之詩文已無遺憾矣余惟公之文
深遠浩博公之詩瑰瑋奇麗求之元季
固當在伯雨玉山鐵崖諸公先卽擬之
明初亦未嘗在潛溪清江季迪諸公後
豈非著作家之泰山喬嶽乎哉況其長

歌短詠以宣光望順帝以李郭期當時
將相涕泗悲號不啻言之繁詞之複卽
郁離子一集類多假托其詞以爲緯嫠
之憂漆室女之歎江湖而憂廟廊庶幾
少陵每飯不忘之意及乎江淮塗炭民
歎瞻烏出佐明祖成大勳其典冊碑銘
紀功頌德鴻篇乃反不及往者什一二


則公之志業不又可論世而知哉鋟旣
竣遂書數語於前其雜著散軼俟廣搜
之以成別集而附其後至公之出處功
業載在史冊不具論旨

皇清雍正八年庚戌歲嘉平月之朔

賜進士出身

特授文林郎浙江處州府青田縣知縣加

一級紀錄二次丙午科浙闈同考官
今陞吏部文選清吏司主事黔南後
學萬里拜手題



劉文成公文集後序

予自束髮就傳時輒聞諸先達談及前明
開創伊始有名世劉文成公為之佐理言
聽計從用成大勲公諱基字伯溫浙江青
田人也比長讀明紀知公之才婉美伊呂
獨惜其文章風旨不少概見歲乙丑恭膺

簡命出宰青邑乃得公之文集讀之敲金戛
玉骨秀神清淵然而與皎然而明如聞鈞
天之奏廣陵之曲益心切嚮注焉欲多購
數卷以公同好詢及公之後裔世居南田
家有藏板有劉生名沛者公之嫡派十四
代孫也仰慕祖德此集之重鋟增補其間
存沒隱見俱能悉其原委因索序于余余

竊惟公之勲業垂史冊而昭天壤公之著
述遍海內而傳奕禩青邑為公桑梓地廟
墓在焉苗裔繁焉則此集板刻自應存青
以備是邦文獻今板藏南田嫡派其存沒
隱見之由誠宜詳著簡端以昭來茲集之
始刻不可考至明季一刻于處郡守林公
一刻於處郡人何公悉稱善本迨遭兵燹

之後邑人罕有存者即南田世胄亦無完
本矣至康熙丁亥有甌郡江心寺僧名月
川者公之嫡裔也因明末孔昭公南遁八
海流落江心八室門殆亦有所托而逃焉
者年臻髫髻囊有素蓄慨然搜刻是集極
力覓尋幸獲郡伯林公原本依其卷次而
釐訂之此集乃復見于世逾年工未竣而

月川又已溘逝所遺之板遂浸沒于甌而
青邑仍無藏板至雍正庚戌前邑令萬公
訪之耆宿知甌江有鈔本借錄而補鐫之
遂成全璧然集雖全而板仍留于南田分
派劉宗鼎之家後又轉寄他姓終不為南
田嫡派有也癸亥歲劉生不吝厚貲始贖
歸南田以貽世守以光先業而公之故物


乃歸故土矣夫以公之才猷固不必以文
辭顯然後世想公之模範慕公之學業者
讀其文章風旨慨然想見其為人亦可感
發而興起則是集又烏可以不備不傳乎
哉余既喜公之文集有歲板而更深嘉
劉生之不忘先德也故綜其原委而樂為
之序嘗

乾隆拾壹年歲次丙寅秋柒月朔

賜進士出身文林郎署浙江處州府青田縣

事

特授嚴州府桐廬縣東魯高居寧拜書



誠意伯劉文成公文集序

余弱齡侍家長者談國初翊運諸名臣輒疑聽之憬然有懷焉長而宦遊四方竊願表揚先哲博綜其遺文頗喜善本若宋文憲公諸集海內翻刻者幾刻益良劉宋匹也其文獨刻於枯蒼歲久字訛舛板又漫漶莫或新之者余奉命按行東浙以辦香謁公祠下詢遺文僅覩此編慨而歎曰嗟乎逝將以功業掩文章耶何善本之寡也屬太守陳君烈萃諸文學重加訂正付於良梓俾海內同好者共焉序曰

高皇帝呼劉伯溫爲吾子房蓋開國首功云然子房自二三籌畫之外其言論風旨不少槩見而公著書之多乃若此何

哉說者謂子房授書黃石舒卷如龍雖神機時出竟善藏其
用塞兌閉門不迫不應爲得老氏之術公剛毅慷慨持大節
畱心經濟遇真主期以王道致太平卻小明王御座諸正
論義形於色危行危言

高皇帝天威嚴重惟公抗辭不以利害怵其中振綱紀斥姦
慝雖李善長亦忌譖之况胡惟庸乎考公履歷豈孔氏所謂
以道事君者非耶漢文成侯我

明文成公上下相符合特帷幄中諸籌畫耳公守孔氏家法
多著書貽後世不若子房之秘密宜也夫其玄機洞鑒神啓
於中天之所授以輔開天之聖妙筭所紆乘時驚發載在國

史者旣與雲漢同其昭回其諸喻之志說觀物之篇憤世之詞
羈旅之幽思薄遊之清况與夫廟堂之所述作士大夫之所
應酬又濔濔如江河欽欽如山嶽醺如惠風朗如景星麗如
卿雲無意擬古而神情悠邈才氣雄豪體裁音節如庖丁解
牛靡不中於自然者公之文章與其功業並傳無斃恢恢乎
有餘芳矣余受觀風之寄光照往訓樹之風聲爲世型範何
敢讓哉或曰畱侯子辟疆方少年能策制諸呂計安劉氏而
公仲子璟不忌嗣君卒全大節茲亦兩文成胤嗣之相似者
劉氏子孫當世世敬修也因附及之

隆慶壬申仲春望日巡按浙江監察御史後學豫章謝廷傑